

ARLEF: UN PROGJET EUROPEAN PE INTEGRAZION CIVÎL DAI IMIGRÂTS

Eumint al cjape dentri 18 partners di Trentin-Sud Tirôl, Tirôl, Carinzie, Venit e Friûl-VJ

Eumint al è il gnûf impegn european pe ARLeF (Agjenzie Regjonâl pe Lenghe Furlane), dopochel relatîf al Erasmus+ Rush, pene inviât.

Fat bon pôcs dîs indaûr, par une cifre totâl di 1.190.000 euros te suaze dal Progjet Interreg Italie Austria 2014-2020 (Obietîf cooperazion teritoriâl europeane), Eumint (Euroregjions, Migrazion e Integrazion), **al fâs lavorâ insiemi bogns 18 partners des provinciis di Bolzan e Trent, dai Land Tirôl e Carinzie e des regjons Venit e Friûl-VJ**. Pal nestri teritori e je cjapade dentri la ARLeF, oltri ae Gect Euregio senza confini, cun sede a Triest.

«Si trate di un progjet plui che mai atuâl – al sclaris il president de ARLeF, Lorenzo Fabbro – che si propon di coinvolzi un numar grant di istituzions intun percors che al ponti ae valorizazion des diversitâts e ae integrazion sociâl e civîl dai migrants, te cussience che il teme epocâl dai flus migratoris al puarte con se sfidis impuartantis di caratar sociâl, economic, politic e culturâl. Eumint – al va indenant Fabbro – al vûl provâ a rispuindi a chescj stimui promovint une cognossince plui grande des peculiaritâts dai teritoris là che i migrants a sielzaran di vivi e lavorâ, partint de presince des minorancis linguistichis storichis. In chest sens, la ARLeF si proponarà ancje tant che pont di incuintri fra minorancis “vecjis” e “gnovis”».

In Tirôl e in Carinzie a son za atîfs cors dedicâts ai valôrs di orientament, cuntune grande esperience te consulence di ricognossiment des competencis lavorativis par personis cun titui forescj traviers, ancje, liniis vuide di integrazion e coordinadôrs di integrazion comunâi. Chescj “esemplis bogns” a vignaran rindûts acessibii ai partners dal Stât talian traviers visitis locâls e la creazion di un laboratori di ideis. In direzion contrarie, invezit, lis esperiencis talianis di acès al marcjât dal lavôr di cui che al domande asîl, a vignaran “travasadis” ai partners austriacs. La convinzion de ARLeF e di chei altris partners di Eumint e je che, une forme cussì largje di cooperazion transfrontaliere, e sedi une premesse buine par un procès di aprendiment inter-istituzionâl e che e sedi un imprest bon par superâ lis strategjiis sperimentadis fin vuê a nivel regjonâl e nazionâl.

Udin, ai 8 di Zenâr dal 2018

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<